

編號 1 號

【上場】徐佳好原作

「防守、防守、防守……大火鑊來咧！」「三分線，咻！擲落去咧，好球，哈哈，還慶！」佢當享受看籃球比賽，因為做得放勢牯喊，所有个煩惱一瞞目都毋見忒咧。記得佢小學四年生時節，林書豪帶領紐約尼克隊連連續續得著好成績，全世界都為佢發癲。因為遭著這陣旋風，五年生該時，佢決定去考籃球體育班。恁好運，分佢考著咧，無想著嗰係辛苦个開始。逐朝晨七點半去到學校訓練兩點鐘，放學後，還愛過練點半鐘，練忒，全班愛在教室寫好功課正做得轉去。最尾練到逐儕走運動坪十過輪都係小可事。因為有同學做伴，還有自家對籃球个熱情，佢毋識喊恹。

見有比賽，爺哀總會當無閒：愛準備食个、愛翕相摺錄影、愛做啦啦隊，三不二時還愛駛車仔載佢兜去比賽，屋下人个支持就係球員最大个力量。爺哀看著佢在球場頂有好个表現，都會緊拍手；係球仔分人抄走¹咧，都當緊張，會在脣頭安慰講：「毋怕，再過來。」一場比賽下來，大家都走到氣掉氣急²摺汗流脈落，愛目珠踎等球、接好球、擲落籃框肚，若係打毋好，歇睏時節會分教練哆：「你兜愛保護球

仔，莫戇戇分人抄走啊，愛走位擋人……。」大家緊捋汗緊咻水，凝神恬恬聽，毋敢故大氣。

打球仔，手腳難免會著傷，成時毋堵好膝頭撞著、腳擰著³、腳盤分人蹬著，撇血、烏青、勾筋係當平常个事情。佢毋驚看醫生做復健，就驚傷著重抑係功課無寫忒，教練就毋分佢上場，斯做得坐凳板，該時心肝肚个毋甘願比訓練還較苦！

小學打籃球个生活，分佢無時間上網搞遊戲，毋單淨成績進步咧，身體變到當砸礮，乜學習著仰般摺人合作，正經體會著這句話：「贏球莫沙鼻，輸球莫失志。」無論輸贏，都分佢成長當多。

1 抄走：音sa\zeu\；此處指「抄到球」。

2 氣掉氣急：音hi\cha\hi\gib；上氣不接下氣。

3 擰著：音

【蟻公】羅紫云原作

還細時節，有一擺，佢發現樹頂有一堆牛屎，就問大人：「該牛仰會恁厲害，屙屎屙到樹頂去。」佢爸笑笑講：「上樹毋怕高，下樹毋怕跌，擲無毛剮無血。分你揣！你知係麼个無？」佢屋下大人長透會做令仔分細人仔揣，所以佢當遽就揣著咧。

認真看正知，阿姆哀哦！歸枝樹梗來來去去、趕上趕下个蟻公無閒直掣扛等弄毛蟲轉竇。蟻公排兩列，一片上、一片下，就像行軍樣，相堵頭還會相借問，當有規矩。毋過，毋知佢講麼个？唉哦！原來該係山蟻仔个竇，山蟻仔膺身有息灰色，較大隻。阿姆講還有一種較細隻个難蟻仔¹也係在樹頂做竇哦！戴在地泥下个，有專門蛀樹仔个白蟻，落水正會出來个大水蟻，還有戴在屋下个黃蟻仔。莫看佢兜細細隻仔哦，佢兜團結合作、煞猛打拚，比佢膺身大加幾下倍个東西，都做得扛等弄弄仔走哦，實在分人佩服。

佢識个有限，其實蟻仔有當多種，有紅、黃、白、烏色，數量比全世界人口還較多，係支配這隻世界个最細生物。佢兜講係益蟲，做得增加泥土个養分，又係蟾蜍²、鯉鯉

个食物。毋過分植物、菜發蚩仔³，也係蟻公个創作。這兜都係臺灣蟻，分佢咬著毋會崩敗。

進口个蟻仔該就無共樣咧！會咬死人。像紅火蟻斯有毒，佢兜係跔等進口个東西上岸个，買一毋止送一哦，可能歸埤歸竇，當遽遭到滿哪仔，有佢出現个位所嘎無蟲蟻咧。佢種菜啊，一年分佢咬幾下擺，含燒火爛⁴、又紅又腫又痛，腫到像麵包樣還會起水膘，幾下隻月都毋會好，當得人惱。

頭擺看著蟻仔，認為佢兜恁煞猛當得人惜；這下看著蟻仔就惱絕渣咧，愛除也無恁該除。有人講分佢食汽油，毋過成本恁高，佢就用硼砂攪白糖來毒，死到烏麻戰筴⁵，一駁仔無咧，無幾久又來咧，毋知係卵過孵出來个抑係別位徙來个，正經頭那當痛。毋知有人做得教佢，毋好儘採咬人無？大家愛和平相處正好啊！

1 難蟻仔：音 nadngie^v er；舉尾蟻。

2 蟾蜍：音 sham shu；蟾蜍，俗稱癩蛤蟆。

3 發蚩仔：音 bod chi er；植物長蚜蟲。

4 含燒火爛：音 hem shau^v fo^v lad；遭日晒或灼傷感到刺痛，難以忍受的樣子。

5 烏麻戰筴：音 vu^v ma zhan^v dad；形容數量極多。

編號 3 號

【鐵甲武士——雞油蛄】邱鴻春原作

熱天來咧！六月半邊仔開始，有兜公園抑係山林步道，下把仔會聽著打早出來運動個人講，有看著雞油蛄咧。可能盡多人毋知麼个係雞油蛄，就係國語講个「獨角仙」啦！伯公岡个萬善爺廟，盡難得廟方有心，慢慢仔向公園化來經營。在廟坪面前个側旁，做一隻雞油蛄个生態教育園區，裡肚種盡多叢白雞油樹。經過三年个照顧，樹仔總算大叢起來咧，雞油蛄个復育也盡成功。

今年七月份，會第一擺舉辦，雞油蛄生態教育結合在地小農个大型活動。期待活動鬧棚圓滿，做得慢慢仔帶動地方个發展，甚至變成在地文化个特色景點。這係避暑期間最好个遶寮位所，不管係摺阿爸、阿姆共下駛車仔來，抑係坐火車來，全盡利便。毋過愛提醒一下，最好在朝晨八點半前來到，越早會看著越多，越晝斯越少，因為雞油蛄乜當驚熱，會囡起來睡目哦！

可能有人會問，雞油蛄係麼个變个？其實佢就係雞嫲蟲變个。又有人會問，仰會安到「雞嫲蟲」恁生趣个名仔呢？

因為雞嫲蟲當肥、當大尾，專門囡在地泥下；頭擺莊下人大部分有畜雞仔，雞嫲會渡等雞子在樹園肚，用腳來緊蹶尋食¹，這係雞嫲最好食乜最有肉个點心，正分人安到雞嫲蟲。

雞油蛄个出世，主要係愛傳代下去，野生个壽命，差毋多有個半月到兩隻月左右，若係人畜个，可能斯一隻月定定。野生个，最好食个東西，就係白雞油樹个樹乳²；人畜个，做得分佢食西瓜摺黃梨。公个雞油蛄在頭那頂有生一支長角，係用來相打、爭地盤、爭舖娘用个，做得摺對方撬起來拂出去，非常砸哦！嫲个無生角，摺公个一比斯知，盡好認，係挖泥囡空个高手。除了逐日日時頭囡泥空歇睏以外，最重要个係，愛生卵該時，會尋一隻最營養、最秘密个位所生卵。等細雞嫲蟲出咧，正有東西好食，又毋會有其他个危險、毋會分雞嫲來食忒。

所以下二擺，你摺阿姆抑係阿婆在菜園肚改園，係有看著雞嫲蟲，愛遽遽摺佢奔泥轉去，正毋會害佢分鳥仔食忒，分佢做得平安快樂長大，變成靚靚又勇敢个鐵甲武士——雞油蛄哦！

1 緊蹶尋食：音gin✓kied\cim shid\；用腳翻找食物。

2 樹乳：音shu+ nen✓；樹的汁液。